



*Ainsi que Iesus cheminoit sur les eaux, les Apostres eurent peur ; mais Pierre oyant sa voix vint à luy.*

**L**ESVS fit monter ses Disciples en la nacelle pour aller deuant luy outre la mer de la ville en Bethaida, iusques à tant qu'il eust donné congé au peuple. Et quand il se fut deffait de la multitude, il monta seul en vne montagne pour prier, & le soir venu, la nacelle estoit au milieu de la mer, & luy estoit seul sur la terre, & vit qu'il auoit grand' peine à nauiger : car la nacelle estoit tourmentée des vagues, & le vent estoit contraire. Enuiron la quatrième veille de la nuit, Iesus vint à eux, & cheminant sur la mer, il vouloit passer outre deuant eux : mais quand ils le virent ils furent estonnez, disans : C'est vn fantosme, & de crainte s'écrièrent ; mais incontinent Iesus parla à eux, disant : Assurez-vous, c'est moy, ne craignez point. Et Pierre luy dist : Seigneur, si c'est toy, commande que j'aille à toy sur les eaux. Et il dit, Vien ; & Pierre descendit, cheminant sur les eaux pour aller à Iesus : mais voyant le vent fort, il eut peur, & enuonça, s'écriant ; Seigneur, sauue-moy ; & incontinent Iesus le prit par la main, luy disant, Homme de petite foy, pourquoy as-tu douté ? Et estant entré en la nacelle, le vent s'appaisa. Lors ceux de dedans l'adorerent, disans, Vrayement tu es le Fils de Dieu.

*S. Matthieu Chap. 14. S. Marc Chap. 6. S. Iean Chap. 6.*